



МОНГОЛ УЛСЫН СОЁЛ, СПОРТ,
АЯЛАЛ ЖУУЛЧЛАЛ, ЗАЛУУЧУУДЫН
САЙДЫН ТУШААЛ

2025 оны 01 сарын 28 өдөр

Дугаар А/13

Улаанбаатар хот

Жендэрийн салбар зөвлөлийн бүрэлдэхүүн,
ажиллах журмыг шинэчлэн батлах тухай

Монгол Улсын Засгийн газрын тухай хуулийн 24 дүгээр зүйлийн 24.2, Жендэрийн эрх тэгш байдлыг хангах тухай хуулийн 18 дугаар зүйлийн 18.4, 19 дүгээр зүйлийн 19.1.4, Монгол Улсын Засгийн газрын 2020 оны 227 дугаар тогтоолоор баталсан Жендэрийн үндэсний хорооны дүрмийн 6 дугаар зүйлийн 6.1, 6.2 дахь хэсгийг тус тус үндэслэн ТУШААХ нь:

1. Жендэрийн эрх тэгш байдлыг хангах тухай хууль, Монгол Улсын урт, дунд, богино хугацааны бодлогын баримт бичиг, хөгжлийн зорилтот хөтөлбөр, арга хэмжээний төлөвлөгөө, Хорооноос гаргасан шийдвэрийг хэрэгжүүлэх ажлыг зохион байгуулж, биелэлтэд хяналт тавих, жендэрийн эрх тэгш байдлыг хангах асуудлаар зөвлөх чиг үүрэг бүхий жендэрийн салбар зөвлөлийн бүрэлдэхүүнийг нэгдүгээр, ажиллах журмыг хоёрдугаар хавсралт ёсоор тус тус баталсугай.

2. Жендэрийн эрх тэгш байдлыг хангах чиглэлээр тухайн жилд хэрэгжүүлэх хөтөлбөр, арга хэмжээг жил бүрийн яамны үйл ажиллагааны төлөвлөгөөнд төсвийн хамт тусган батлуулж, хэрэгжилтэд хяналт тавих, удирдлага, арга зүйгээр хангаж ажиллахыг Төрийн нарийн бичгийн даргын албан үүргийг түр орлон гүйцэтгэгч, Жендэрийн салбар зөвлөлийн дарга (А.Даваажаргал)-д даалгасугай.

3. Энэ тушаал гарсантай холбогдуулан “Жендэрийн салбар зөвлөл байгуулах тухай” Соёлын сайдын 2020 оны 10 дугаар сарын 16-ны өдрийн А/17 дугаар тушаалын хоёрдугаар хавсралт, “Жендэрийн салбар зөвлөлийн бүрэлдэхүүнийг шинэчлэн байгуулах тухай” Соёлын сайдын 2022 оны 06 дугаар сарын 03-ны өдрийн А/158 дугаар тушаалыг тус тус хүчингүй болсонд тооцсугай.


САЙД



Ч.НОМИН

14190010032

Соёл, спорт, аялал жуулчлал, залуучуудын
сайдын 2025 оны 11 дүгээр сарын
28-ны өдрийн А/13 дугаар
тушаалын нэгдүгээр хавсралт



ЖЕНДЭРИЙН САЛБАР ЗӨВЛӨЛИЙН БҮРЭЛДЭХҮҮН

Салбар зөвлөлийн дарга:

Соёл, спорт, аялал жуулчлал, залуучуудын
ямны Төрийн нарийн бичгийн дарга

Гишүүд:

Засгийн газрын хэрэгжүүлэгч агентлаг Соёл
урлагийн газрын дарга

Засгийн газрын хэрэгжүүлэгч агентлаг Биеийн
тамир, спортын улсын хорооны дарга

Соёл, спорт, аялал жуулчлал, залуучуудын
ямны Төрийн захиргааны удирдлагын газрын
дарга

Соёл, спорт, аялал жуулчлал, залуучуудын
ямны Соёл, урлагийн бодлогын хэрэгжилтийг
зохицуулах газрын дарга

Соёл, спорт, аялал жуулчлал, залуучуудын
ямны Соёлын өвийн бодлогын хэрэгжилтийг
зохицуулах газрын дарга

Соёл, спорт, аялал жуулчлал, залуучуудын
ямны Аялал жуулчлалын бодлогын
хэрэгжилтийг зохицуулах газрын дарга

Соёл, спорт, аялал жуулчлал, залуучуудын
ямны Залуучуудын хөгжлийн бодлогын
хэрэгжилтийг зохицуулах газрын дарга

Соёл, спорт, аялал жуулчлал, залуучуудын
ямны Биеийн тамир, спортын бодлогын
хэрэгжилтийг зохицуулах газрын дарга

Соёл, спорт, аялал жуулчлал, залуучуудын
ямны Хяналт-шинжилгээ, үнэлгээ, дотоод
аудитын газрын дарга

Соёл, спорт, аялал жуулчлал, залуучуудын
ямны Төрийн албаны салбар зөвлөлийн
нарийн бичгийн дарга (хүний нөөцийн асуудал
хариуцсан албан тушаалтан)

Соёл, спорт, аялал жуулчлал, залуучуудын
ямны Салбарын статистикийн шинжилгээ,

мэдээллийн сангийн зохицуулалт хариуцсан
ахлах мэргэжилтэн

Монгол Улсын Үндэсний номын сангийн
захирал

Байгалийн түүхийн музейн захирал

Улсын дуурь бүжгийн эрдмийн театрын
захирал

Монголын эрүүл мэндийн гүйлтийн холбоо
НҮТББ-ын Удирдах зөвлөлийн дарга
(зөвшилцсөнөөр)

Монголын урлагийн ажилтны холбооны
Удирдах зөвлөлийн гишүүн (зөвшилцсөнөөр)


Салбар зөвлөлийн нарийн
бичгийн дарга:

Соёл, спорт, аялал жуулчлал, залуучуудын
яамны Төрийн захиргааны удирдлагын газрын
Сургалт, жендэр, хүний эрх, үндэсний хороо
хариуцсан мэргэжилтэн

---oOo---

Соёл, спорт, аялал жуулчлал, залуучуудын
сайдын 2025 оны 01... дүгээр сарын
28...-ны өдрийн 1/13... дугаар
тушаалын хоёрдугаар хавсралт

ЖЕНДЭРИЙН САЛБАР ЗӨВЛӨЛИЙН АЖИЛЛАХ ЖУРАМ



НЭГ. НИЙТЛЭГ ҮНДЭСЛЭЛ

- 1.1. Энэхүү журмын зорилго нь Жендэрийн үндэсний хорооны Жендэрийн салбар зөвлөл /цаашид "салбар зөвлөл" гэх/-ийн зохион байгуулалт, чиг үүрэг, үйл ажиллагаа болон түүнтэй холбогдох бусад харилцааг зохицуулахад оршино.
- 1.2. Салбар зөвлөл нь Жендэрийн эрх тэгш байдлыг хангах тухай хууль болон Жендэрийн үндэсний хорооны дүрэмд заасан бүрэн эрхийг хэрэгжүүлж, төрийн үйлчилгээг үзүүлэх чиг үүрэг бүхий яамны хэмжээнд ажиллах Жендэрийн үндэсний хорооны зохион байгуулалтын бүтцийн нэгж байна.

ХОЁР. САЛБАР ЗӨВЛӨЛИЙН БҮРЭЛДЭХҮҮН, ҮЙЛ АЖИЛЛАГААНЫ ЗОХИОН БАЙГУУЛАЛТ

- 2.1. Салбар зөвлөлийн бүрэлдэхүүн, ажиллах журмыг Засгийн газрын гишүүн, Монгол Улсын сайд /цаашид сайд гэх/-ын тушаалаар батлуулж мөрдөнө.
- 2.2. Салбар зөвлөл нь ажлаа Сайдын өмнө хариуцан тайлагнана.
- 2.3. Салбар зөвлөл нь төрийн харьяа байгууллага, төрийн бус байгууллага, олон нийтийн оролцоог хангасан байх ба аль нэг хүйсийн төлөөлөл 40 хувиас багагүй байна.
- 2.4. Салбар зөвлөл нь салбар зөвлөлийн дарга, нарийн бичгийн дарга /жендэрийн асуудал хариуцсан мэргэжилтэн/, гишүүдээс бүрдэнэ.
- 2.5. Салбар зөвлөл нь харьяа агентлаг, байгууллагуудад дэд зөвлөлтэй байна. Салбар зөвлөл нь дэд зөвлөлийг мэргэжил арга зүйн удирдлагаар ханган, хяналт тавьж ажиллана. Дэд зөвлөл нь бүрэлдэхүүн, үйл ажиллагааны дүрмийг энэхүү журамд нийцүүлэн боловсруулж, байгууллагын удирдлагын шийдвэрээр баталж мөрдөнө. Дэд зөвлөл нь салбар зөвлөлийн өмнө ажлаа хариуцан тайлагнана.
- 2.6. Салбар зөвлөл нь 13-19 хүртэл, дэд салбар зөвлөл нь 3-9 хүртэл хүний бүрэлдэхүүнтэй байна.
- 2.7. Салбар зөвлөлийн үйл ажиллагааны үндсэн хэлбэр нь хуралдаан байна. Салбар зөвлөлийн хуралдааныг жилд 4-өөс доошгүй /улирал тутам/ удаа хийнэ. Хуралдааныг салбар зөвлөлийн дарга удирдан явуулна.
- 2.8. Шаардлагатай тохиолдолд салбар зөвлөлийн ээлжит бус хурлыг салбар зөвлөлийн даргын санаачилгаар, эсхүл зөвлөлийн гишүүдийн олонхын санаачилгаар зарлан хуралдуулж болно. Гишүүдийн 50-иас дээш хувь нь ирсэн тохиолдолд хуралдааныг хүчинтэйд тооцно.
- 2.9. Салбар зөвлөлийн хуралдаанаар хэлэлцсэн асуудлыг хуралдаанд оролцсон нийт гишүүдийн олонхын саналаар шийдвэрлэнэ. Гишүүдийн санал тэнцсэн тохиолдолд хуралдаан даргалагчийн саналаар асуудлыг шийдвэрлэнэ.
- 2.10. Салбар зөвлөл нь хуралдааны дэгийг энэ журамд нийцүүлэн өөрөө тогтооно.
- 2.11. Салбар зөвлөлийн хуралдаанаар хэлэлцэн шийдвэрлэсэн асуудлаар салбар зөвлөлийн даргын тушаал, хурлын тэмдэглэл гарна.
- 2.12. Салбар зөвлөл нь хэлэлцсэн асуудлаарх холбогдох шийдвэрийг харьяа агентлаг, байгууллагуудад хүргүүлж, хэрэгжилтэд хяналт тавьж ажиллана.

2.13. Салбар зөвлөл шаардлагатай тохиолдолд хэлэлцэх асуудалд холбогдох оролцогч талуудыг оролцуулсан өргөтгөсөн хурлыг зохион байгуулна.

2.14. Салбар зөвлөлийн дарга, нарийн бичгийн дарга, гишүүд хүлээсэн үүргээ хүндэтгэн үзэх шалтгаангүйгээр удаа дараа биелүүлээгүй тохиолдолд Төрийн албаны тухай хууль болон холбогдох бусад хуульд заасан хариуцлага хүлээлгэнэ.

ГУРАВ. САЛБАР ЗӨВЛӨЛИЙН ЧИГ ҮҮРЭГ

3.1. Бодлого боловсруулах, хэрэгжүүлэх хүрээнд:

3.1.1. Салбарын бодлого, хөгжлийн зорилтот хөтөлбөр, төсөл, төлөвлөгөө зэрэг баримт бичгийн төсөлд жендэрийн эрх тэгш байдлыг хангасан эсэх талаарх дүн шинжилгээг тогтмол хийж, үнэлгээний тайлан, зөвлөмжийн хамт Засгийн газарт өргөн мэдүүлэх; Жендэрийн эрх тэгш

байдлыг хангах үзэл баримтлалыг салбарын хууль тогтоомж, бодлого, хөгжлийн зорилтот хөтөлбөр, төсөл, шийдвэрт тусгах;

3.1.2. Салбарын хууль, бодлого, хөгжлийн зорилтот хөтөлбөр, шийдвэрийг дэмжих хүрээнд салбарын жендэрийн бодлого болон түр тусгай арга хэмжээг хууль тогтоомжид нийцүүлэн боловсруулж, шийдвэрийн төслийг Засгийн газар болон салбарын сайдад өргөн мэдүүлж шийдвэрлүүлэх, хэрэгжилтийг салбарын хэмжээнд зохион байгуулж, мэргэжил арга зүйн удирдлагаар хангаж ажиллах;

3.1.3. Жендэрийн эрх тэгш байдлыг хангах хууль тогтоомж, бодлого, хөгжлийн зорилтот хөтөлбөр, шийдвэрийг хэрэгжүүлэх үйл ажиллагааны тухайн жилийн төлөвлөгөө, түүнийг хэрэгжүүлэхэд шаардагдах төсвийн төслийг боловсруулж, яам, салбар зөвлөлийн гишүүн байгууллагуудын жилийн үйл ажиллагааны төлөвлөгөөнд тусгуулан, тухайн оны эхний улиралд багтаан баталж, Жендэрийн үндэсний хороонд хүргүүлэх;

3.1.4. Жендэрийн эрх тэгш байдлыг хангах хууль тогтоомж, бодлого, хөгжлийн зорилтот хөтөлбөр, шийдвэрийг хэрэгжүүлэх үйл ажиллагааны тухайн жилийн төлөвлөгөөний хэрэгжилтийг зохион байгуулах, хэрэгжилтэд хяналт тавьж, хууль тогтоомжийн дагуу тайлагнах;

3.1.5. Жендэрийн эрх тэгш байдлыг хангахад шаардлагатай салбарын, орон нутгийн байгууллагуудын чадавхыг бэхжүүлэх;

3.1.6. Салбар, орон нутгийн байгууллага болон түншлэгч байгууллагуудын хамтын ажиллагааг дэмжиж, салбар дундын зохицуулалтыг хангах;

3.1.7. Жендэрийн эрх тэгш байдлыг хангах ажлаар байгууллага, иргэнийг шагнал урамшуулалд тодорхойлох.

3.1.8. Жендэрийн эрх тэгш байдлыг хангах тухай хуульд заасан холбогдох тайлан мэдээг бэлтгэж, тогтоосон хугацаанд Жендэрийн үндэсний хороонд хүргүүлэх;

3.2. Хяналт-шинжилгээ, үнэлгээ хийх хүрээнд:

3.2.1. Байгууллагын гүйцэтгэлийн төлөвлөгөөнд Жендэрийн эрх тэгш байдлыг хангах тухай хууль, холбогдох бодлого, хөгжлийн зорилтот хөтөлбөрийг хэрэгжүүлэх талаар тусгах, хэрэгжилтийг үнэлэх хүрээнд жендэрийн мэдрэмжтэй шалгуур үзүүлэлтийг боловсруулж, хяналт үнэлгээний тогтолцоонд нэвтрүүлэх;

3.2.2. Жендэрийн эрх тэгш байдлыг хангах бодлого, хөгжлийн зорилтот хөтөлбөр, үйл ажиллагааны хэрэгжилтэд оролцоонд суурилсан хяналт шинжилгээг жил бүр, үнэлгээг хууль, бодлогод заасан хугацаанд тус тус хийж гүйцэтгэх, дүнг Жендэрийн үндэсний хороонд тайлагнах;

3.2.3. Жендэрийн эрх тэгш байдлыг хангах бодлого, хөгжлийн зорилтот хөтөлбөр, үйл ажиллагааны хэрэгжилтэд оролцоонд суурилсан хяналт шинжилгээ, үнэлгээ хийх хүрээнд жендэрийн эрх тэгш байдлыг хангах чиглэлээр үйл ажиллагаа явуулдаг төрийн бус байгууллага, судалгаа шинжилгээний байгууллагыг татан

оролцуулах.

3.3. Жендэрийн статистик мэдээллийг бүрдүүлэх, ашиглах, олон нийтэд хүргэх хүрээнд:

3.3.1. Салбарын хэмжээнд эрхэлж буй асуудлын хүрээнд хүйсээр ангилсан статистикийн мэдээллийг бүрдүүлэх;

3.3.2. Салбарын хүйсээр ангилсан статистикийн мэдээлэлд үндэслэн жендэрийн эрх тэгш байдлын төлөв байдал, бодлогын үр нөлөөг үнэлэх, үнэлгээнд үндэслэн бодлого, хөтөлбөрийн хэрэгжилтийг эрчимжүүлэх арга хэмжээ авах;

3.3.3. Салбарын хүйсээр ангилсан статистикийн мэдээллийг эмхэтгэн, хэрэглэгчдэд хүргэх ажлыг зохион байгуулах;

3.4. Жендэрийн сургалт, судалгаа, гэгээрлийн ажлын хүрээнд:

3.4.1. Салбарын ажилтан, албан хаагчдын жендэрийн талаарх ойлголт, мэдлэгийг дээшлүүлж, Жендэрийн эрх тэгш байдлыг хангах тухай хууль тогтоомжийг таниулан сурталчлах;

3.4.2. Жендэрийн үндэсний хорооны цахим хуудаст байрших "Удирдах албан тушаалтнуудад зориулсан жендэрийн талаарх мэдлэг, ойлголтыг дээшлүүлэх цахим сургалт"-д холбогдох албан тушаалтнуудыг хамруулж, гэрчилгээ авах;

3.4.3. Салбарын мэдээлэл, гэгээрэл, сурталчилгааны ажлыг жендэрийн эрх тэгш байдлыг эрхэмлэсэн соёлыг төлөвшүүлэх, хүнийг ялгаварлан гадуурхалтаас ангид байлгах зорилгод нийцүүлэн зохион байгуулахад арга зүйн дэмжлэг үзүүлж, хэрэгжилтэд хяналт тавьж ажиллах;

3.4.4. Жендэрийн эрх тэгш байдлыг хангах хууль тогтоомж, төрийн бодлого, тэдгээрийг хэрэгжүүлж буй сайн туршлагыг иргэд, аж ахуйн нэгж байгууллагуудад таниулан сурталчлах ажлыг хэвлэл мэдээлэл, олон нийтийн байгууллагуудтай хамтран зохион байгуулах;

3.4.5. Жендэрийн эрх тэгш байдлыг хангах чиглэлээр аж ахуй нэгж, төрийн бус байгууллага, олон улсын байгууллага, иргэний үйл ажиллагааг дэмжиж, тэдгээртэй хамтран ажиллах, сайн туршлагыг сурталчлах.

3.5. Хөдөлмөрийн харилцаанд жендэрийн тэгш байдлыг хангах хүрээнд:

3.5.1. Хөдөлмөр эрхлэлтийн бодлого, хөдөлмөрийн харилцааг жендэрийн ялгаварлан гадуурхалтаас ангид байлгах, ажлын байранд жендэрийн эрх тэгш байдлыг хангах талаарх Жендэрийн эрх тэгш байдлыг хангах тухай хуулийн 11 дүгээр зүйл (Хөдөлмөрийн хуулийн шинэчилсэн найруулгын 7 дугаар зүйлд заасан дарамт, хүчирхийлэл, бэлгийн дарамтыг хориглох, түүнээс урьдчилан сэргийлэх)-д заасан ажил олгогчийн үүргийн хэрэгжилтийг салбарын төр, төрийн бус байгууллагуудад хангуулах ажлыг зохион байгуулж, холбогдох дэмжлэгийг үзүүлж ажиллах;

3.5.2. Салбарын хүний нөөцийн бодлого төлөвлөлтийг салбарын хүйсийн судалгаанд үндэслэн боловсруулан хэрэгжүүлэх, шаардлагатай тохиолдолд түр тусгай арга хэмжээг авах саналыг боловсруулж, шийдвэрлүүлэх;

3.5.3. Жендэрийн эрх тэгш байдлыг хангах тухай хуулийн 10 дугаар зүйлд заасан төрийн албан дахь жендэрийн эрх тэгш байдлын баталгааг хангаж, төрөөс эрэгтэй, эмэгтэй хүний төрийн албанд орох, албан тушаал, эрхлэх тэгш эрх бодитой хэрэгжих боломж, нөхцөлийг бүрдүүлэх чиглэлээр шаардлагатай зөвлөмж, дүгнэлтийг гаргаж, хэрэгжилтийг хангуулж ажиллах;

3.5.4. Салбарын хэмжээнд байгуулагдан ажиллаж буй хороо, зөвлөл, комиссын бүрэлдэхүүнд хүйсийн тэнцвэрт байдлыг хангуулах, хэрэгжил- тийг тайлагнах;

3.5.5. Хүүхэд төрүүлэх, асрах чөлөө авсан ажилтны мэргэжил, мэргэшлийн ур чадварыг хөдөлмөрийн зах зээл дээр өрсөлдөж чадахуйц түвшинд байлгах зорилгоор тэднийг давтан сургалтад хамруулах бодлогыг салбарын хэмжээнд авч

хэрэгжүүлэх;

3.5.6. Ажлын байранд бэлгийн дарамт гарахаас урьдчилан сэргийлэх, бэлгийн дарамтыг үл тэвчих орчныг бүрдүүлэх, ажлын байранд бэлгийн дарамтаас урьдчилан сэргийлэх, гарсан гомдлыг барагдуулах хэм хэмжээг хөдөлмөрийн дотоод журамд тусгуулах ажлыг салбарын хэмжээнд зохион байгуулах;

3.5.7. Байгууллагын түвшинд жендэрийн мэдрэмжтэй байгууллагын соёл, ажил ар гэрийн тэнцвэрт байдлыг хангах, гэр бүлийн үүргээ хослуулах, эрүүл мэндээ хамгаалах, хөдөлмөрийн эрүүл, аюулгүй, таатай орчин нөхцөлийг бүрдүүлэх, ажлын цагийн уян хатан зохицуулалтыг хийхэд арга зүйн зөвлөгөө өгөх;

3.6. Жендэрийн мэдрэмжтэй төсөвлөлтийн арга зүйг нэвтрүүлэх хүрээнд:

3.6.1. Салбарын бодлого, хөгжлийн бодлого, хөтөлбөр, төслийг жендэрийн мэдрэмжтэй төлөвлөх, төсөвлөх арга зүйг нэвтрүүлэх;

3.6.2. Төрийн болон орон нутгийн өмчийн хөрөнгөөр бараа, ажил үйлчилгээ худалдан авах болон төрөөс үзүүлж, байгаа бүх төрлийн үйчилгээг жендэрийн мэдрэмжтэй болгох арга зүйн дэмжлэг үзүүлэх;

ДӨРӨВ. САЛБАР ЗӨВЛӨЛИЙН ДАРГА, НАРИЙН БИЧГИЙН ДАРГА, ГИШҮҮДИЙН ЧИГ ҮҮРЭГ

4.1. Салбар зөвлөлийн дарга нь Жендэрийн үндэсний хорооны гишүүн байх бөгөөд Сайдын өмнө ажлаа хариуцаж дараах эрх, үүргийг хэрэгжүүлнэ.

4.1.1. Салбар зөвлөлийн үйл ажиллагааны хэтийн зорилго, стратегийг тодорхойлох;

4.1.2. Салбар зөвлөлийн үйл ажиллагааг дэд зөвлөлийн үйл ажиллагаатай уялдуулан нийцүүлэх, нэгтгэн зохицуулах, хэрэгжилтэд хяналт тавьж ажиллах;

4.1.3. Салбар зөвлөлийн хуралдаанаар хэлэлцэх асуудлын дарааллыг тогтоон хөтөлбөрийг баталж, хуралдааныг даргалан холбогдох асуудлыг хэлэлцүүлэх;

4.1.4. Салбар зөвлөлийн гишүүдийн хариуцах ажил үүргийг тухайн байгууллагын гүйцэтгэлийн төлөвлөгөөнд шалгуур үзүүлэлтийн хамт тусгуулж, биелэлтийг тооцох;

4.1.5. Жендэрийн эрх тэгш байдлыг хангах хууль тогтоомжийн хэрэгжилтийн явц, үр дүнгийн талаар Сайдад тайлагнах, өгсөн чиглэл, үүрэг даалгаврын хэрэгжилтийг хангах;

4.1.6. Жендэрийн эрх тэгш байдлыг хангах тухай хуульд заасан холбогдох тайлан, мэдээллийн бодит байдалд хяналт тавих;

4.1.7. Салбар зөвлөлийг төлөөлөн бусад байгууллага, албан тушаалтантай харилцах;

4.1.8. Салбар зөвлөлийн гишүүний ажил үүргийн биелэлтийг дүгнэж, урамшуулах, шаардлага тавих, хариуцлага хүлээлгэх;

4.1.9. Жендэрийн асуудал хариуцсан мэргэжилтний ажлын ачаалал, үр дүн, үр чадвартай нь уялдуулан холбогдох хууль, журамд нийцүүлэн дэмжих, урамшуулах, тогтвор суурьшилтай ажиллуулах;

4.1.10. Жендэрийн эрх тэгш байдлыг хангах чиглэлээр зарцуулж буй төсвийн зарцуулалтад хяналт тавих.

4.2. Салбар зөвлөлийн нарийн бичгийн дарга дараах эрх, үүргийг хэрэгжүүлнэ.

4.2.1. Салбар зөвлөлийн эрх, үүргийг хэрэгжүүлэхтэй холбоотой бүхий л асуудлаар Салбар зөвлөлийн даргад дэмжлэг үзүүлж ажиллах;

4.2.2. Салбар зөвлөлийн дарга, гишүүдийг жендэрийн эрх тэгш байдлыг хангах чиглэлээр холбогдох мэдээ мэдээллээр хангах;

4.2.3. Салбар зөвлөлийн хуралдаанаар хэлэлцэх асуудлын төлөвлөгөөг боловсруулж, гишүүдэд урьдчилан танилцуулж, санал авах, нэгтгэн боловсруулах;

4.2.4. Салбар зөвлөлийн үйл ажиллагааны жилийн төлөвлөгөөг салбар зөвлөлийн

даргаар батлуулах;

4.2.5. Салбар зөвлөлийн үйл ажиллагааны жилийн төлөвлөгөөний биелэлтийг улирал тутам тооцож, салбар зөвлөлийн хуралдаанд танилцуулан хэрэгжилтийг хангуулах ажлыг зохион байгуулах;

4.2.6. Салбар зөвлөлийн хуралдааны бэлтгэлийг хангах, хуралдааны шийдвэр, тэмдэглэлийг зохих журмын дагуу албажуулах, холбогдох байгууллага, албан тушаалтанд хүргүүлэх;

4.2.7. Жендэрийн эрх тэгш байдлыг хангах тухай хуулийн 19.1.8, 19.1.9-д талаар авч хэрэгжүүлсэн үйл ажиллагааны үр дүнгийн тайланг Үндэсний статистикийн хорооноос баталсан маягт, зааврын дагуу холбогдох дэд зөвлөлүүдээс авч нэгтгэн боловсруулж, холбогдох албан тушаалтнаар албажуулан тогтоосон хугацаанд (дэлгэрэнгүй тайлангийн хамт) Жендэрийн үндэсний хороонд хүргүүлэх;

4.2.8. Яам болон түүний харьяа агентлаг байгууллагын дэргэдэх үндэсний хэмжээний хороо зөвлөл, комиссын төлөөллийн хүйсийн мэдээллийг бүрдүүлж, Жендэрийн үндэсний хороонд хүргүүлэх;

4.2.9. Салбар зөвлөлийн хуралдааны тэмдэглэл болон холбогдох тайлан, мэдээллээр архивын нэгж бүрдүүлэн хуульд заасан хугацаанд байгууллагын архивд хүлээлгэн өгөх.

4.3. Салбар зөвлөлийн гишүүд дараах эрх, үүргийг хэрэгжүүлнэ.

4.3.1. Салбар зөвлөлийн хуралдаанд хүндэтгэн үзэх шалтгаантайгаас бусад тохиолдолд биечлэн оролцох;

4.3.2. Салбар зөвлөлийн тухайн жилийн төлөвлөгөөнд тусгасан ажлыг чиг үүргийн дагуу хариуцан зохион байгуулах, тайлагнах;

4.3.3. Салбар зөвлөлийн чиг үүрэгт хамаарах асуудлаар санал гаргах, хуралдаанаар хэлэлцүүлэх;

4.3.4. Салбар зөвлөлийн даргын эзгүйд түүний даалгаснаар хурал удирдах, эрх бүхий байгууллагын шийдвэрээр салбар зөвлөлийн даргын албан үүргийг түр орлон гүйцэтгэх;

4.3.5. Жендэрийн эрх тэгш байдлыг хангах чиглэлээр тасралтгүй суралцах, мэргэших;

4.3.6. Жендэрийн үндэсний хорооноос зохион байгуулж байгаа аливаа арга хэмжээнд биечлэн оролцох, холбогдох удирдлага, албан тушаалтнуудыг оролцуулах.

ТАВ. САЛБАР ЗӨВЛӨЛИЙН САНХҮҮЖИЛТ

5.1. Салбар зөвлөлийн үйл ажиллагаанд шаардагдах бичиг хэргийн болон зохион байгуулалтын зардлыг тухайн төрийн захиргааны төв байгууллага хариуцна.

5.2. Салбар зөвлөлийн үйл ажиллагааны төлөвлөгөөнд тусгагдсан арга хэмжээг хэрэгжүүлэхэд шаардагдах зардлыг яам, агентлаг, харьяа байгууллагуудын төсөвт суулгаж санхүүжүүлнэ.

---oO---